

## Huanocca ima teppe tahidecca

### 1 Juan

Huanopa Jesocca dodosse tabaqqi ojaria. Ajijaro ima teppepi Jesodsa jehe quinajaridenidsa dsodo inajaro. Pohnadenidsa: —Occa ejedenissa tiquinajaro —najari. Huano dsodo inajaropi Diopa ssiaja tahi, Pohna Bedi Jesocristo naco imasiri cappirahi, najari. Pocca dsodoniji onihipi: Imecotedeni tedseje eti cahanerara cananina bica tani. Diodsa imadinissa tanijinepi imasiri jirehe imadina, najari.

Huanocca dsodonijipi 5 nani. Tahideccapi Jeso tahimari. Dsotodeccapi ajijaro ima teppepaji. Ima teppe onihinaqu dsodo inajaro. Dsotode ima teppe onihina dsodo inapomajaro. Dsotode jadahi tocajadsa naco Apocalipsis dsodo inajaro.

#### *Jesocristopa Dio Atti camittehecca*

<sup>1</sup> ¿Nija imecotedeni? Tiadenidsa Dio Atti camittehecca ima dsodo inajaro. Najaripa dsama toja-jeraccadsama madipojari. Jidapana naco madihi paja nahi. Iapi pohna atti imittade. Assire naco qqini inade. Pohnadsa jaijaridsadsa inoccodsa qqini idsanapode. Idsepedsa naco huapi bara inade. Najaripa Dio Atti camittehecca. <sup>2</sup> Diopa najaro camittehe iadsa nohue inajarode. Najaro camittehe qqini inajaropi aji ecomeraridsajaropaji. Tiadenidsa naqui najaro camittehe jiquejeranicca tahimarini huati

inajaropaji. Najaró camittehepi Abi Diodsa anipojaro. Najaró iadsa ahuatojarode. <sup>3</sup> Nadsama aji qqui inajaró, imitajaro tiadenidsa huati inajaropi iadsa tijariquimananijine. Pina ia Abi Diodsa ijariquijarossa, Pohua Bedi Jesocristodsa naqui ijariquijarossa tiquinanijine. <sup>4</sup> Aji ima dsodo inajaropi ticcadeni huatidsehe pajiranissa tanijine.

### *Diopa ssiaja tahi*

<sup>5</sup> Aja Jesocristo ia mari tocanabaquijaricca imaha aji tiadenidsa huati inajaropaji: Diopa ssiaja tahi. Pohuadsapi dsidsini nohuerani. <sup>6</sup> Ettipi: —Diocca iquejenani —ihinanaraha dsidsinidsa jaijaridsadsapi imaidsajaro. Pajissehe imittaraha najarossa inana-jerani. <sup>7</sup> Naraha ssiajanidsa jaijaridsadsapi pina Dio ssiaja taha madjarissa inanijine. Nadsapi imecotedeni tedseje ijariquijaropaji. Dio Bedi Jesocristo emene naqui icca imasiri huapima inanamossi-dsanapopjaropaji.

<sup>8</sup> Ettipi: —Imasiri ocappirani —inadsapi ia icamaidsa tani. Pajissehe iadsa nohuerani. <sup>9</sup> Naraha nahatoqquri inani: Diopa maidsera tahi. Pocca imapi toccanissa tajaro. Pohuadsa icca ima ecomeradsa: —Occa ima tabaccora tani. Imasiri ocajini —inadsapi Diopa icca imasiridsa: —Epejena, ohuadi-jerani —najari. Icca tabaccorehe sse inajaro. <sup>10</sup> Pohua Attipa: —Madijapa imasiri cajiridsamanajari —najari. Naraha ettipi: —Ohuapi imasiri ocappirani —inadsapi pina: —Diopa mamaidsade —inajarossa najaro. Nema inanadsapi ibodidsa Dio Atti nohuerani ahuato tani.

## 2

### *Jesocristopa icca ima cacattemade*

<sup>1</sup> Ohuemecotedeni, tiadenipi occa ejedenissa tiquinajaro. Ajijaro ima tiadenidsa dsodo onajaro, imasiri

tinanamana-jeranijine onadsa. Naraha imasiri tinanamana tani. Imasiri tinanamanadsapi ticcadeni ima cattermadepa Abihuaji anihi. Najaripa Jesocristo. Pohnuapa imari pajiranissa tajaro. <sup>2</sup> Aja Jesocristo itohui pohua ccaccoradsa dsoqquejaripa icca tabaccorehe inanamossidsa Diodsa ibicanijine. Icca imasiri manaconi tojajaripa ia motta ojari inanicca manaconi tojajarahi. Madija dsama huapima madiridsamanajaridenicca imasiri manaconi tojajari pohnuapa.

*Diocca dossenijidsa iboraqqiri inana*

<sup>3</sup> Diocca dossenijidsa iboraqqiri inadsapi nahatoqqiri inajaro: Pajissa Diopa iadsa jidsera tajari. <sup>4</sup> Naraha madija ohuaha attidenipa: —Diodsa nahatoqqiri inani —quinaraha Diocca dosseniji ecahuamana-jeradsapi maidsamanajari. Pajissehepi pohnuadenidsa anijerani. <sup>5</sup> Madijapa Diocca dossenijissa inamanajarodenina Dio Pohnuadsa huatideni huanaqqiri najari. Poccadeni tohuati huanehepi Diodsa pajiranissa tajaro. Ijine ima bicani nema nadsana nahatoqqiri inajaro. Pajissa iapi pocca iquejenajaro. <sup>6</sup> Madija attipa: —Diocca ojani —nadsapa pocca madie pina Jesocca madiessa nadsana bica tani.

<sup>7</sup> Ohuemecotedeni, titohuideni ohuati huana tani. Diocca dosseniji tiadenidsa dsodo onajaropi dsati jerani. Aji tahide timittamanapojarocca tiadenidsa dsodo onapomajaro. Pocca dosseniji anipojaropi: —Timecotedenidsa tetideni huanaqqiri naji —najaro anijonajaropi timittamanani paji naccani. <sup>8</sup> Naraha aji jidapana tiadenidsa Diocca dosseniji dsodo onajaropi dsati. Najaro dossenijipi Jesocristodsa ahuato, iadsa ahuato tajaropaji. Dsidsinipi tohuatorajonani. Ssijajani pajissaccana tossijaridsajonani.

<sup>9</sup> Madija attidenipa: —Iapi ssiajanidsa imadijaro —quiquinaraha pohuadeni imecotedsa nacasser-aqquri nadsapa dsidsinidsa madimanahipaja naccajari. <sup>10</sup> Pohuadeni imecotedsa huatideni huanaqquri naha madimanadsana pajissa ssiajanidsa madimanajari. Ssiajanidsa madimanadsapa pohuadeni imecotedsa imasiri inanamana-geranitohui. <sup>11</sup> Naraha pohua imecotedsa nacassera tajaripa dsidsinidsa madijari. Dsidsinidsa ccaridsajari. Pohua jahine ssamo tahi. Dsidsinijine pina nocco sirissa najari.

*Ajjaro dsamacca imasiri inebonicca ima*

<sup>12</sup> Ohuemecotedeni, occa ejedenissa tiquinajaro. Tiadenidsa dsodo onajaropi Jesopa ticcadeni imasiri manaconi tojarijine Dio ticcadeni imasiri epeje inanajaropaji. <sup>13-14</sup> Jadahideni, tiadenidsa naqui dsodo onajaro. Aja Dio dsama inahatopo-geraccadsama madijaripa Jeso pohuadsa tinoccodeni jidseraqquri nani. Dsabissodeni, dsohuatodeni, tiadenidsa naqui dsodo onajaro. Dio Atti tibodidenidsa anijaro. Dacoraqquri tiquinani. Aja Diocca huadi Satanapa ajamani tinanamanajari. Tiadenina deni tiquejenajaro.

Jehe ohuemecotedeni, tiadeni huapima Abi Diodsa nahatoqquri tiquinani. Najaroa aji tiadenidsa occa ima dsodo onajaropaji. <sup>15</sup> Ajijaro dsamacca imatohuira tetideni huanaqquri nejeraji. Ajijaro dsamacca inoccodsa qqui inajarotohuipi tetideni huanaqquri nejeraji. Ajijaro dsamacca imatohuira timadimanadsapi ticcadeni ima ahuatotojaro: Diodsapi tetideni huanaqquri nejerani. <sup>16</sup> Ajijaro dsamadsa imadijarocca imapi ajima najaro: Aji timedenicca tohuini, aji tinoccodenidsa qqui tiquinajarrocca tohuini, aji tettidenipi: —Odsepe sse tana.

Ohuana deni ojana —tiquinajaro tohuini tiquinaraha najaro ima huapimapi Diojine jerani. Najaro huapimapi ajijaro dsamacca ima. <sup>17</sup> Naraha ajijaro dsamapi jicani-tohui. Ajijaro dsama nemanehecca tabaccorehe tohuini quinahicca naqui jicanitohui. Naraha madija Dio Pohua tohuini nahiccara inanamanajarodenipa Pohuadsa madimana-dsanapohuitohui.

*Cristodsa huadiqqiri najarideni*

<sup>18</sup> Ohuemecotedeni, occa ejedenissa tiquinajaro. Dsama jicanicca huada tohuajirajonani. Cristo ccanibote nadsapa pohuadsa huadi tajari ccajonahitohui. Najaro imapi timittamanapode. Jidapana naco Cristodsa huadiqqiri najaridenipa ahuatoma-ridsamanahi. Najaropi nahatoqqiri inani: Dsama jicanicca huada bacco tajaro. <sup>19</sup> Pohuadenipa iadsa quequeriqquimana naraha ia tonebobaqqijari. Pajissa iadsama Jesocristocca toquejenadsapa nassa iadsa quequeriqquimana-dsanapohuitohuiraha iadsa quejemamana-jaradsapa poccadeni ima iadsa ahuato tajaro: Pohuadenipa imecote quejena-jarahi.

<sup>20</sup> Naraha tiadenipi pina pohuadenissa tiquinejerani. Cristo tiadenidsa Dio Corime da inaridsadsapa tibod-idenidsa madijari. Najari Dio Corimejine Diocca pajissehe nahatoqqiri tiquinajaropaji. <sup>21</sup> Pajissacca ima tiadenidsa jidsera tadsapi aji tiadenidsa dsodo onajaropaji. Pajissehecca ima ssamoqqiri tiquinani onejerajaro. Tiadenipi nahatoqqiri tiquinani pajissehepi maidsehe jerani. <sup>22</sup> ¿Nejecojarina mamaisade? Aja madija atti: —Jesopa Cristo-Mesia jarahi —nandaridsa najarina mamaisade. Najaripa Cristodsa huadi tajari. Abi Diodsa: —Pajissa madihi —najarajari. Pohua Bedi Jesocristodsa naco: —Pajissa madihi —najarajari. <sup>23</sup> Nadsama aja madija

attideni: —Jesopa Dio Bedi jarahi —quiquinanajaridenipa Dio jiraha mamadimana najari. Naraha aja madija attideni: —Jesopa Dio Bedi —quiquinanajaridenina Abi Diocca ejedeni toquejenajari.

<sup>24</sup> Jehe, Dio Bedi tahimari timittamanapode. Najaropi tibodidenidsa tecahuamananissa taji. Aji timittamanapojarocca naqui tibodidenidsa aninipaji nadsapi Abi Diodsa, Pohua Bedidsa tijariquimana-dsanaponitohui. <sup>25</sup> Jehe, najaropi Jesocristo toccamacossani-jaraccadsama iadsa huati tapojaride: —Ohuadsa tiquejenadsapi camittehe jiquejeranicca ticajimana-dsanaponitohui —nade iadsa.

<sup>26</sup> Ajijaro ima tiadenidsa dsodo onajaropi nahatoqquri tiquinaponijine: Madija tiadeni tocamaisa-baquimanahijine animanahi. <sup>27</sup> Naraha Jesocristopa tiadenidsa Dio Corime da inaridsajaripa tiadenidsa madihipaja nahi. Najaria aja tiadeni mari tocanabaqqujaripaja. ¿Nejecotohui madijacca marinaja onihi timittamananijine? Dio Corimena ima huapima tiadeni mari tocanabaqqujari. Pajissara huati huati tajari, maidsa-jarajari. Aja Dio Pohua Corime tiadeni mari tocanabaqqipojaricca marinajadsa disseraqquri tiquinaji, Cristodsa timadimana-dsanaponijine.

### *Diocca ejedeni iquejenajarocca ima*

<sup>28</sup> Ohuemecotedeni, occa ejedenissa tiquinajaro. Jidapapi Jesocristo pahuadsa timadimananissa dsanapoji. Nani nidsa Jeso pohua ccaronapomadsa tibodideni cappina-jeranijine. Pohua qqui tiquinadsa comehiqquri tiquinejeranijine. <sup>29</sup> Jesocristopa ima bicani pajiranissa inanajaro. Najaro pocca ima nahatoqquri tiquinadsapi aja madija ima bicani pajiranissa inanamanadsapi Diocca madija toquejenahi nahatoqquri tiquinajaro.

## 3

*Diocca ejedeni iquejenajarocca ima denima aniccani*

<sup>1</sup> ¡Qqui! Abi Diopa itohui huati cahanari canajar-ijine madija iadsa: —Diocca ejedeni —quiquinanajari. Nadsapi pajissa pocca ejedeni iquejenajaro. Naraha ajijaro dsamacca madija huapimapa Diodsa noccodeni jidsaqquri napoja najaria iadsa naco noccodeni jidsaqquri najaripaja. <sup>2</sup> Ohuemecotedeni, titohuideni ohuati huana tani. Jidapapi Diocca ejedeni iquejenani. Naraha ited-sejemacca ima denimapi ssamoqquri inaccani. —¿Iapi pina nejecossa inapadseje? —inaraha najaro imapi iadsa ahuato tejeraccani. Naraha ajijaro imana nahatoqquri inajaro: Nidsa Jesocristo iadsa ahuatoni-pomadsa pohua qqui inahissa tadsapa iapi pina pohuassa inanitohui. <sup>3</sup> Nadsama aja madija attideni: —Jeso ahuatoni-pomadsapa pina pohuassa inanitohui —quiquinanajaripa pohuadeni cacahuamanahissa tajari, bodideni huireqquri nahijine. Pina Jeso pohua imasiri cappira, bodi huire tarjirissa quinahijine.

<sup>4</sup> Naraha aja madija imasiri ihinanamana najaropi Diocca dossenijidsa iboqquri najari. ¿Imasiripi nejecoma najaro? Imasiripi aji Diocca dossenijidsa huatajo inajarona imasiri. <sup>5</sup> Naraha tiadenipi nahatoqquri tiquinani: Aja Jesocristopa icca imasiri inajicanijine namihuaji ccaronajari. Pihuapa imasiri cappiraja najari. <sup>6</sup> Nadsapa pohuadsa madimanahissa tarjaridenipa imasiri jiraha madimanajari. Naraha imasiridsa disseraqquri najaridenipa Jesodsa noccodeni jidsaqquri najari. Pohuadsa bodideni ssamoqquri najari. <sup>7</sup> Ohuemecotedeni, occa ejedenissa tiquinajaro. Paji, madija ohuaha tiadeni tocamidsabaqquirana. Ima pajissapi ajima najarona

paji: Jesocristopa ima bicani ponira pajiranissa tehe cajijari. Aja madija ima bicani pajiranissa inanamanadsapi pina Jesojinessa inanamanajaro. Pohuadenipa Dio inapajirabaquihissa tapoja najari. <sup>8</sup> Naraha madija imasiri totonanadedenipa Diocca huadi Satanacca madija. Satanapa tahide imasiri inanajonajaroa jidapana ajijaropaji. Najaricca tabaccorehe inajicanijine Dio Bedi ccaronajari.

<sup>9</sup> Nadsama Djojine dsati iquejenadsapi imasiri ihinana nejerajaropaji. Diocca daniji madie bicani icajijaro. Diocca ejedeni iquejenadsapi imasiri inanadsanaponijine ssamo tani. <sup>10</sup> —¿Nejecojaridenina Diocca ejedenideni? ¿Nejecojaridenina Diocca huadi Satanacca ejedenideni? —titiquina naraha nahatoqquiri tiquinanijinepi ajima najarona paji: Madija ima bicani ihinanamana nejerajardenipa Diocca ejedeni quejena-jarajari. Madija pohuadeni imecotedenidsa huatideni huaneraqquiri najarideni naco Diocca ejedeni quejena-jarajari. Najaridenina Diocca huadi Satanacca ejedeni quejenajari.

#### *Eti cahanerara canana*

<sup>11</sup> Ajijaro marinajapi tahide mari mari quinapodsa timittamanajonajaroa jidapana timittamanani paji naccani. Najaropi eti cahanerara cananijinecca marinaja. <sup>12</sup> Iapi pina Caino huati huanera tajarissa inejerana. Cainopa Satanaccaja najari. Najaria aja pohua imecote inanadsoqquejaripaja. ¿Nejecotohui pohua imecote inanadsoqquejaritta? Pohua imecote pa pina Diocca dossenijissa inanadsapi ima bicani inanajaro. Naraha Cainopa pina Diocca dossenijissa inana-jeradsapi tabaccorehe inanajaro.

<sup>13</sup> Ohuemecotedeni, tiadenidsa ohuattipi ajima onajaro: Ajijaro dsamacca imadsa madimanajaridenipa tiadenidsa nacasseraqquiri nadsa huajo ticanire tejerana, onajaro. <sup>14</sup> Aji imecotedsa eti huana tadsapi icca



ima ahuato tajaropaji. Iapi paji idsoqquerinicca dsoqquehe inebodsapi camittehe jiquejeraniccadsana imadijaro. Naraha aja madija pohua imecotedsa huati huanera tajaripa pina huatiahi madi-dsanapojarissa najari. <sup>15</sup> Nadsama aja madija pohua imecotedsa nacassera tajaripa pina pohua imecote inanadsoqquejarissa najari. Nadsama tiadenipi nahatoqquiri tiquinani: Aja madija pohua tesse inanadsoqquedsapa Diocca camittehe jiquejeranicca pohua bodidsa nohueraha madijari. <sup>16</sup> Jesopa pocca madie iadsa eccoradsapi itohui dsoqquejaripaja. Najarojinea aji tohuati huanehe icahatterajaropaji. Nema nadsapi ia naqui imecotedeni tocassiejerahijinepa iana ia eccorani bica tani. <sup>17</sup> Tiadenidsa dsepe sse tajari ojaria aniraha pohua imecote cappirahi qqui tadsa acco icamaradsapa ¿pohua bodidsa Diocca tohuati huanehe cajico? Caji-jarahi. <sup>18</sup> Ohuemecotedeni, occa ejedenissa tiquinajaro. Iapi ettidsara eti huana tani ojari nejerana. Aji idsepe ijijaroma imecotedenidsa eti huana tana. Pajissa Diocca tohuati huanehe icajidsapi icca madiedsa ahuato inanana, onajaro.

### *Diodsa huatide icappina-jeraniijine*

<sup>19</sup> Nadsama imecotedenidsa eti huana tadsapi pajissehe jinedecca iquejenani nahatoqquiri inajaro. Diodsa huatide naqui ibodi cappina-jeraniijine. <sup>20</sup> Ibodipi iadsa: —Imasiri ticajini —na tani. Naraha icappina-jerana. Ibodipi ajimani, Diona deni tojahi. Diopa ima huapima nahato tajari. Ibodicca ima naco nahato tajari. <sup>21</sup> Ohuemecotedeni, titohuideni ohuati huana tani. Ibodipi iadsa: —Imasiri ticajini —nejeradsapi Diodsa icappina-jerajaropaji. <sup>22</sup> Pohuadsa huati inadsa naqui icca huatinaja iadsa da da inajaropaji. Icca huatinaja iadsa toजारopi pocca dossenijidsa iboraqquiri ineje,

Pohua jipa tajarissa inaneje najarojine. <sup>23</sup> Dio pocca dossenijipi ajima najaro: —Occa ejedeni Jesocristodsa jehe tiquinaji —najari. —Timecotedeni tedseje tetideni cahanerara canaji —najari iadsa. <sup>24</sup> Pocca dossenijidsa iboraqqiri inadsapi pohuadsa imadijaro. Pohua naco iadsa madijaripaja. Aja Pohua Corime iadsa da inaridsajaripa najarijine Dio iadsa madihi nahatoqqiri inajaropaji.

#### 4

##### *Mamaidsadedenidsa nahatoqqiri tiqinanjine*

<sup>1</sup> Ohuemecotedeni, titohuideni ohuati huana tani. Madija tiadenidsa huati huati tadsa pohua attipa: — Ohuapi Dio Corimejine Dio Atti huati huati onajaro —nadsapa pohua attidsa pajissa tiquinejeraccadsa tinocodsamanaccajo. —¿Pohua bodidsa Dio Corime anico? ¿Ani-jaraco? —titiquina nana. Madija mamaidsadepa dsama huapimadsa ijiridsahi. Pohuadeni attipa: —Dio Corimejine huati huati ihinanajaro —quiquinanaraha mamaidsamana najari. <sup>2</sup> Tiadenipi poccadeni ima nahatoqqiri tiquinaji: Aja madija Dio Corime cajimanajari attidenipa: —Jesocristopa Dio Bedi. Pahuapa pina madijassa naha tossonajari —quiquinanajaridenina pajissehe cajimanajari. <sup>3</sup> Naraha aja Dio Corime cappiramanajaridenipa: —Jesopa Dio Bedi jarahi —quiquinanajari. —Pina iassa naha tossonajari —quiquinana-jarajari. Pohuadenipa Jesodsa huadiqqiri najari. Pohuadeni bodipa pina Cristodsa huadi tajari bodissa quinajari. Nadsama aja Cristodsa huadi tajari ccajonahitohui quiquinanahipa timittamanapode. Jidapana naco pahuapa ajjaro dsamadsa madihi.

<sup>4</sup> Ohuemecotedeni, occa ejedenissa tiquinajaro. Tiadenipi Diocca tiquejenarojine mamaidsadedenidsa

deni tiquejenani. Aja tiadenidsa Dio madijarina dadorajari. Ajijaro dsamacca madijapa ajamani toquejenahi. <sup>5</sup> Puhuadenipa ajijaro dsamacca imatohuira madimanajari. Nama quinajarijine ajijaro dsamacca imara huati huati totoquina najaripaja. Nadsapa ajijaro dsamacca madija Diocca quejena-jarajaridenipa poccadeni ima mittade jipaqquri najaripaja. <sup>6</sup> Naraha iapi Diocca iquejenajaro. Madija Diodsa nocco jidsera tajaripa icca marinaja mittajari. Naraha Diocca jarajaripa icca marinaja mitta-jarajari. Nama nadsapa iadsa ahuato tajari: Aja icca marinaja mittajaripa pohua bodidsa pajissehe cajijarijine pajissara huati huati tajari. Naraha icca marinaja mitta-jarajaripa pohua bodidsa maidsehe dadorajarojine maidsehera huati huati tajari.

*Diodsa eti huana tadsapi imecotedsa naqui eti huana tani-jine*

<sup>7</sup> Ohuemecotedeni, tiadenidsa ohuati huana tani. Iapi itessedeni tedseje eti cahanerara canaridsana. Tohuati huanehepi Diocca iadsa ccajonajaro. Tohuati huanehe cajimanajaridenipa Diocca ejedeni quejenajari. Puhuadenipa Diodsa noccodeni jidseraqquri najari. <sup>8</sup> Naraha tohuati huanehe cappiramanajaridenipa Diodsa noccodeni jidsaqquri najari. Diopa tohuati huanehe jinede. <sup>9</sup> Diopa iadsa huati huana tadsa pocca tohuati huanehe iadsa ahuato inanajaro. Najaria aja Pohua Bedi ojariraha namihuaji dosse inaronajari, icassiejeranijine. <sup>10</sup> Iapi Diodsa eti huanaqquri napo-jeraraha Diopa iadsa huati huana tadsa Pohua Bedi iadsa dosse inaronajari. Bedipa itohui pohua ccaccoradsapa icca imasiri manaconi tojararipaja. Najarona tohuati huanehe pajissacca.

<sup>11</sup> Ohuemecotedeni, titohuideni ohuati huana tani. Dio iadsa huati cahanari canadsapa ia naqui itessedeni tedseje eti cahanerara canaridsana, onajaro. <sup>12</sup> Madijapa

Dio qqui toquinaja cama-jarahi. Naraha eti cahanerara canadsana Dio iadsa madijari. Pocca tohuati huanehe iadsa anini ahuato tajaro. <sup>13</sup> Nadsama Dio Pohua Corime iadsa da inajarojine Dio iadsa madihi nahato, manaco Diodsa imadini nahato inajaropaji. <sup>14</sup> Aja Jeso inoccodsa qqui inajari tahimari ijine ahuato tanijine inadsa pohua tahimari huati huati inajaropaji: Abi Diopa pocca Ejedeni dosse inaronajari, dsama huapimacca madija Tonassia-jade tojahijine. <sup>15</sup> Nadsapa madija attia: —Jesopa pajissa Dio Bedi —najarina Diodsa madijari. Dio naco pohuadsa madijari.

<sup>16</sup> Diopa iadsa huati cahanari canahi nahatoqquiri inajaro. Najarodsa pajissa inajaro. Diopa tohuati huanehe jinede. Tohuati huanehema imadjaropi Diodsa imadijaro. Dio naco iadsa madiridsajari. <sup>17</sup> Pajissa imecotedenidsa eti huana tadsapi ajijaro ima nahatoqquiri inapojaro: Nidsa madija huapimacca ima cattermanijinecca huada bacco tadsapi Dio pocca quejena-jarajaridenidsa najidsohue inassonarinitohui. Naraha iapi icappina-jeranitohui. Nema inajaropi pina Jesocristo ajijaro namidsa madidsassa inajaro. <sup>18</sup> Tohuati huanehe anidsapi cappinehe nohuerani. Tohuati huanehe iadsa pajiranissa tadsapi ibodicca cappinehepi toqquena tani. Naraha Diocca najidsohue noppineni icappinadsapi Diocca tohuati huanehe iadsa pajiranissa tejeraccani ahuato tajaro.

<sup>19</sup> Aji Diodsa eti huanaqquiri najaropi Dio Pohuana iadsa huati huana tapojari. <sup>20</sup> Naraha madija attipa: —Ohuapi Diodsa ohuati huana tani —naraha pohua imecotedsa nacassera tajaripa mamajidsade. Najaripa pohua imecote pohua noccodsa qqui taraha Diopa qqui tajarajari. Pohua imecotedsa huati huanera tadsapa Dio qqui tajarajaria huati huana tahijinepa ssamo tajaripaja. <sup>21</sup> Ajijaro marinajapi Jesocristo ia mari tocanabaqqui-

jaride: —Diodsa tetideni huanacquiri nadsapi timecote-denidsa naqui tetideni huanacquiri nana — najaride iadsa.

## 5

### *Ajjaro dsamacca imadsa deni iquejenajaro*

<sup>1</sup> Ettipi: —Jesopa pajissa ia Idinide Cristo-Mesia —inadsapi Diocca ejedeni iquejenajaropaji. Iapi imehidsa eti huanacquiri nadsapi pocca ejedenidenidsa naqui eti huanacquiri najaropaji. <sup>2</sup> Diodsa eti huanacquiri nadsa pocca dossenijissa inanadsapi nahatoqquri inajaro: Diocca ejedenidenidsa naqui eti huanacquiri najaro. <sup>3</sup> Diodsa eti huanacquiri nadsapi pocca dossenijissa inana tani. Pocca dossenijipi najo tejerani. <sup>4</sup> Diocca ejedeni iquejenadsapi iana deni iquejenajaro. Ajjaro dsamacca imapi ajimani tojani. Jesocristodsa jehe inanissa tadsapi iana deni iquejenajaro. <sup>5</sup> ¿Nejecojaridenina ajjaro dsamacca imasiridsa deni toquejenahijine nahatoqquri najari? Aja madija: — Jehe, Jesopa Dio Bedi —quiquinanajaridenina paja.

### *Jeso tahimari ecomeramanani 3 najaro*

<sup>6</sup> Jesocristo ajjaro namidsa ccaronadsa pohua tahimari pajissa tojaridsajaro nahatoqquri inanijinepi ima 3 nehe ahuato tajaro. Ima ojariepi passocca. Najaria Jesopa passodsa totopa cajjari. Naraha passocca ima ojarijerani. Ima onihipi pohua emenecca. Najaria aja Jeso dsoqquedsa pohua emene toccajari. Ima onihi naqui Dio Corime Jeso tahimari iadsa ahuato inanajarocca. Pohuapa pajissara huati huati tajari. <sup>7</sup> Nadsapi Jeso tahimari 3 najaro ecomeramanajaro. <sup>8</sup> Dio Corimedsa nahatoqquri inajaro. Jeso passodsa totopa cajjari naqui nahatoqquri inajaro. Jeso dsoqquedsa pohua emene toccahicca naqui nahatoqquri inajaro. Aji ima 3 najaropi najarossa naridsajaro. Jesopa Cristo-Mesia Dio Bedi. <sup>9</sup> Madija

pohua noccodsa qqui tajaricca ima huati tahi imittadsapi pohuadeni attidsa pajissa ina tani. Naraha Dio pocca ima iadsa ecomerajarona denima bica tajaro. Aji Dio iadsa ima ecomerajaropi pocca Ejedeni tahimari. <sup>10</sup> Dio Bedidsa pajissa inadsapi pocca ima ibodidsa madidsajaro. Naraha madija aja Dio Pohua Bedi tahimari huati huati tajaridsa pajissa quina-jaradsapa pina Diodsa maidsani huahua quinajarissa najari. <sup>11</sup> Aji iadsa Dio pocca ima ecomerajaropi camittehe jiquejeranicca iadsa da inajaro. Najaro camittehe jiquejeraniccapi Dio Bedidsana anijaro. <sup>12</sup> Dio Bedidsa iquejenadsapi camittehe jiquejeranicca icajini. Naraha Dio Bedidsa iquejena-jeradsapi camittehe jiquejeranicca icappirani.

### *Huanocca ima jicanicca*

<sup>13</sup> —Jesopa pajissa Dio Bedi —tiquinajarodenidsa ajijaro ima dsodo onajaro, camittehe jiquejeranicca tica-jimanani nahatoqquiri tiquinanijine. <sup>14</sup> Diodsa pajissa inanissa tadsapi ajijaro ima nahatoqquiri inajaro: Dio Pohua jipa tahicca Pohuadsa huati huati inadsapi pajissa icca huatinaja mittahi. <sup>15</sup> Nadsapi icca huatinaja mittahi nahatoqquiri inadsapi icca huatinaja icajini nahatoqquiri inajaro.

<sup>16-17</sup> Tabaccorehe huapimapi imasiri. Imasiri onihi onihipi Dio epeje inananjine jipa tahi. Nadsapi timecote imasiri inanani qqui tiquinadsapi pohuatohui Diodsa huati huati titiquina naji, nahi Dio pocca imasiri epeje inadsa pohuadsa camittehe da inanijine. Naraha imasiri onihipi Diodsa denima tabaccora tajaro. Najaropi Dio epeje inananjine jipera tahi. Madija najaro imasiri tonanadsa Diopa pocca imasiridsa epeje inana-jeranitohui. Nidsa pohua dsoqquedsapa najidsohue jiquejeranihuaji paja tojarahitohui. Timecote najaro imasiri aji Dio epeje

inananiijine jipera tahicca inanani qqui tiquinadsapi pohuatohui Diodsa huati tiquinaji onejerajaro.

<sup>18</sup> Naraha iapi nahatoqquri inajaro: Aja Diocca ejedeni toquejenajaridenipa imasiridsa madimana-jarahi. Najaridenipa Dio Bedi ecahuabaqqijari, nahi Satana inajidsobaqqi-jarahijine. <sup>19</sup> Nadsama iapi Diocca ejedeni iquejeneje najaro ibodi nahatoqquri inajaro. Naraha dsama nemanehecca madija motapa Diocca huadi Satana attidsara iboraqquri najari. <sup>20</sup> Ima onihi naqui nahatoqquri inajaro: Dio Bedi iadsa ccaronajaripa ibodidsa tohuattehe da inajarojinea Diopa iadsa jidsera tajari-paja. Diopa pajissa ojari najari. Pohuana Dio. Iapi najaridsa imadi-dsanapojaro. Iapi pocca Ejedeni Jesocristodsa imadijaro. Najarina pajissa Dio Pohua ia Cacahuade. Najaripa camittehe jiquejericca jinede. <sup>21</sup> Ohuemecotedeni, occa ejedenissa tiquinajaro. Paji, siba nahatonidsapi: —Ia cacahuade —tiquina tejeraji. Aja Diodsara: —Ia Cacahuade ojarihi —tiquinaji, onajaro.

El Nuevo Testamento en el idioma Culina (mádjia) del  
Perú

Kulina: El Nuevo Testamento en el idioma Culina (mádjia) del Perú  
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 14 Jun 2022 from source files dated 30 Nov  
2021

4c7c82dd-1f0f-5341-b6e6-26970c27fee2